

مونودراما بيع الفرحة

قررررب .. اسمع نكتة جديدة .. قررررب ... حكاياتي كثيرة مابتنتهيش .. اسمع من بيع الفرحة و عيبيش .. قررررب اسمع نكتة جديدة .. سخرية ببلاش و ضحك زي الجلاش و النكتة لو ماحبتهاش اضربني و وديني بسرعة ع الانعاش ولا اقولك اسمع مني استرخي كده .. اشترى مني النكتة و اضحك بكل انتعاش .. قررررب

ازيكوا .. وحشتوني اوي .. و انا وحشتكوا طبعاً صح .. اكيد وحشتكوا .. ايه .. ماوحشتكوش .. خلاص ماشي انا مش زعلان منكوا .. انا بس جاي عشان اضحكوا .. انا ضحكت ناس كتيير اوي قبلكوا .. و مش هاغلب معاكوا .. انا اصلي قديم اوي ف المجال .. و المجال لم عيال .. لا انا مش م العيال دي .. انا بجري وراهم ف كل حنة .. ف كل حنة .. عشان المهم .. و اتعلم منهم .. انتوا ماعرفتوني لسه .. انا اسف نسيت اعرفكوا بنفسي .. انا بلياتشو .. النهارده هاكيلكوا حكايتين ..

اول حكاية مرعبة .. ارجو ان اصحاب القلوب الضعيفة تسد ودانها .. انا برده بخاف على مشاعركوا .. الحكاية بتبتدي ببنت بتدرس ف الثانوية .. ابوها كان متعود يوصلها كل يوم المدرسة و يروح على شغله .. البنت دي ضحك عليها واد من اياهم .. ربنا يحفظ بناتنا جميعاً .. المهم .. الأب ف يوم جاله تليفون من المدرسة بتبلغه ان بنته ماجاتش المدرسة بقالها اسبوع .. الأب استغرب و قال ازاى ده انا بوصلها بنفسي .. تاني يوم راح يوصل بنته المدرسة بس ماراحش على شغله .. فضل مستني يشوف بنته بتروح فين .. لقاها ماشية مع واحد و داخلين عمارة .. طلع وراهم و خبط ع الباب ف فتحت البنت .. ابوها جابها من شعرها .. الشاب حاول يلحقها ف جاب سكيانة و هدد ابوها .. و ف لحظة رشق السكيانة ف بطنه .. و قالها بسرعة شيليه معايا و هاتيه نحطه ف البانيو .. حطوه ف البانيو و حطوا عليه مسحوق الغسيل عشان الرغوة تخفي الجثة .. البنت نزلت عشان تروح البيت .. وصلت بيتها و خبطت ع الباب .. لقت ابوها اللي بيفتح .. البت صوتت و اترمت ف حضن ابوها .. و قالتله انت عايش ازاى .. قالها يابنتي .. مع تايد الغسيل .. مفيش مستحيل (يضحك)

حكايتي الثانية .. حكاية شاب .. متفائل إلى أبعد الحدود .. اللي زيه دلوقتي مش كثير .. و يمكن يتعدوا ع الصواب .. خريج كلية تربية و كان الاول ع الدفعة بامتياز .. كان بيحب بنت .. كانت كل حياته .. كان حلم حياته انه يتقدملها .. بس منين .. قرر يشتغل .. اشتغل عند ناس كثير جدا .. بس فلوسه كانت على قده .. ماهو بيصرف على امه اللي مالوش غيرها .. و فنفس الوقت بيكون نفسه .. ف يوم رجع من الشغل لقي امه نائمة .. كالعادة جه يصحبها عشان يديها الدوا .. بيصحبها مش بترد .. شكلها نائمة ف سابع نومة .. حاول معاها تاني .. مش بترد .. بدأ يعرق و قلبه يدق بسرعة .. ردي عليا يا أمي .. ماما .. كل ده نوم .. اصحي يا أمي .. ردي عليا عشان خاطري .. ماما .. راحت منه .. لكنه مايأسش .. و قال الحمدلله .. و قرر يكمل

حياته بأمل جديد .. لسه في واحدة مستنيه ييجي يتقدملها .. قدر يحوش مبلغ كويس .. و قرر انه يروح يتقدملها .. ف راح عشان .. عشان يحضر خطوبتها ..
بقى لوحده .. بس كعاداته مابيينأسش .. و قرر يعيش لنفسه و للناس اللي دايمًا بيحبهم .. و راح السيرك و بقى بلياتشو ..

[illegible]

قررررب .. اسمع نكتة جديدة .. قررررب ... حكاياتي كثيرة مابتنهيش .. اسمع من بيع
الفرحة و عييش .. قررررب اسمع نكتة جديدة .. سخرية ببلاش و ضحك زي الجلاش و
النكتة لو ماحبتهاش اضربني و وديني بسرعة ع الانعاش ولا اقولك
اسمع مني استرخي كده .. اشترى مني النكتة و اضحك بكل انتعاش .. قررررب